

四庫全書

集部

欽定四庫全書

集部

松雪齋集卷二

詳校官庶吉士_臣朱理

侍讀_臣孫球覆勘

總校官降調編修_臣倉聖脉

校對官編修_臣曹錫齡

謄錄監生_臣郭文燭

欽定四庫全書

集部五

松雪齋集

別集類四元

提要

臣等謹案松雪齋集十卷外集一卷元趙孟

頴撰孟頴字子昂宋太祖之後以秀王伯圭

賜第湖州故為湖州人年十四以父蔭入仕

宋亡家居會程鉅夫訪遺逸於江南以孟頴

入見即授兵部郎中累官翰林學士承旨卒

追封魏國公諡文敏事蹟具元史本傳楊
載作孟頫行狀稱所著有松雪齋詩集不
詳卷數明萬厯間江元禧所編松雪齋集
寥寥數篇實非足本惟焦竑經籍志載孟
頫集十卷與此本目次相合而史所稱琴原
樂原得律呂不傳之妙者檢勘均在其中外
集雜文十九首亦他本所未載蓋全帙也孟
頫以宋朝皇族改節仕元頗不諧于物論觀

其和姚子敬韻詩有同學故人今已稀重嗟
出處寸心違句是晚年亦不免於自悔然論
其才藝則風流文采冠絕當時不但翰墨為
元代第一即其文章亦揖讓於虞楊范揭之
間不甚出其後也集前有戴表元序見剡源
文集中末題大德戊戌歲蓋孟頫自汾州知
州謁告歸里時裒集所作請表元序之者表
元不妄許與而此序推挹甚至其有所以取

之矣後人編錄全集仍錄此序以為冠非無意也乾隆四十六年十月恭校上

總纂官

臣紀昀

臣陸錫熊

臣孫士毅

總

校

官

臣陸

費

墀

松雪齋集序

吳興趙子昂與余交十五年凡五見每見必以詩文相振激子昂才極高氣極爽余跂之不能及然而未嘗不為余盡也最後又見於杭始大出其平生之作曰松雪齋詩文集者若干卷屬余評之余惟人之各以其材自致於世必能相及也而後相知必相知也而後能相為言余於子昂不相及而何以知何以言乎子昂曰雖然必言之余曰必言之則就吾二人之今所歷者請以杭

喻剡東西之山水莫美於杭雖兒童婦女未嘗至杭者知其美也使之言杭亦不敢不以為美也而不如吾二人之能言何者吾二人嘗身歷而知之而彼未嘗至也他日試以其說問居杭之人則言之不能以皆一彼所取於杭者異也今人之於詩之於文未嘗身歷而知之而言之同者亦未之有也子昂未弱冠時出語已驚其里中儒先稍長大而四方萬里重購以求其文車馬所至填門傾郭得片紙隻字人人心愜意滿而去此非可

以聲色致也而子昂豈謂其皆知我哉故古之相知者
必若韓孟歐梅同聲壹跡綢繆傾吐而後為遇而後世
乃欲望此於道途解后之間則又過矣余評子昂古賦
凌厲頓迅在楚漢之間古詩沈涵鮑謝自餘諸作猶傲
睨高適李翱云子昂自知之以為如何大德戊戌仲春
既望剡源戴表元叙

欽定四庫全書

松雪齋集卷一

元 趙孟頫 撰

賦

吳興賦

猗與休哉吳興之為郡也蒼峰北峙羣山西迤龍騰獸舞雲蒸霞起造太空自古始雙谿夾流繇天目而來者三百里曲折委蛇演漾連漪東為碕灣匯為湖陂泓渟

皎澈百尺無泥貫乎城中繚於諸毗東注其區渺渺潏潏以天為隄不然誠未知所以受之觀夫山川映發朗日月清氣焉鍾沖和攸集星列乎斗野勢雄乎楚越神禹之所底定泰伯之所奄宅自漢而下徃徃開國洎晉城之攬秀據實沿流千雉面勢作邑是故歷代慎牧必掄大才選有識前有王謝周虞後有何柳顏蘇風流互映治行同符皆所以宣上德意俾民懽娛况乎土地之所生風氣之所宜人無外求用之有餘其東則塗泥

膏腴畝鍾之田宿麥再收秔稻所便玉粒長腰照筥及
箱轉輸旁郡常無凶年其南則伏虎之山金蓋之麓浮
圖標其巔蘭若棲其足鼓鐘相聞飛甍華屋衡山絕水
魯史所錄盤紆犬牙陂澤相屬蒹葭菰蘆鴻頭荷華菱
芰鳧茨萑蒲軒于四望弗極鳥可勝數其中則有魴鯉
鰱鱠鉞頭白小鱸鰕膾餘龜鼉龜鼈有蛟龍焉長魚如
人歆浪生風一舉百鈞漁師來同罔罟笮簪汕是工
鳴榔鼓枻隱然商宮巨細不遺噦噦喁喁日亦無窮其

西則重岡複嶺川原是來其北則黃龍瑤阜之洞玲瓏
長壽之塢縣水百仞既高且阻磴硤嶽峯歲磊礧礧怪
石萬數旅乎如林其高陵則有楊梅棗栗榘梨木瓜橘柚
夏孕枇杷冬華槐檀松柏椅桐梓漆之屬文竿綠竹篠
簞雜選味登俎豆材中宮室下逮薪樵無求不得其平
陸則有桑麻如雲郁郁紛紛嘉蔬含液不蓄長新陸伐
雉兔水弋鳧雁舟楫之利率十過半衣食滋植容容衍
衍既樂且庶匪教伊慢於是有搢紳先生明先聖之道

以道之建學校立庠序服逢掖戴章甫濟濟多士日躋
於古迺擇元日用量幣尊玄酒陳簠簋選能者秉周禮
贊者在前獻者在後雍容俯仰周旋節奏成禮而退神
人和右當是之時家有詩書之聲戶習廉恥之道辟雍
取法列郡觀效誠不朽之盛事已或者難曰自古論著
之士曷嘗不識人物紀風俗哉夫人才者濟時之具而
風俗者為治之質也今子徒摭摭細碎推比貨食高談
不切炫耀自飾莫大於斯二者顧乃畧而弗錄雖文奪

組繡聲諧金石竊為子不取也僕應之曰否子獨不聞夫子之言乎十室之邑必有忠信今年且千載地且千里人物之富胡可殫紀史冊畢書可無贅矣若乃風俗之隆汙在為政者之所移易又弗可得而定著也夫吳雖介在江左嘗被至德之風矣且吾聞之風行而草偃日中而表正上行下效置郵傳命辟若季子為守言游為令以仁義為化禮樂為政鎮以不貪之寶喻以不言之信即刑可使不用俗可使益盛方將還敦朴於上古

考休祥於庶徵今美則美矣又可遂以為定乎於是難者唯唯逡巡而失意

求友賦答袁養直

思古人之不可見兮心鬱結而不舒登高丘而遠望兮獨歎慨乎增歔波洋洋其汜濫兮欲濟而無航膏吾車而孤往兮山鬱乎其蒼蒼四顧闐其寂寥兮思蹇產而不鑠采衆芳以自娛兮聊假日以愉樂塞長洲之芙蓉兮擘大澤之蘭茝擷江離之秀穎兮結秋蘭以為佩世

俗方尚同兮余獨異乎今之人謂蘭茝為不芳兮蛾眉
枉之以善姪衆不可以戶說兮歷年歲而靚閔變心以
從俗兮而吾又不忍徯朝陽之鳴鳳兮企空谷之白駒
何驚駘之衆多兮鸚雀紛其瞿瞿寧飢渴以需時兮恥
屬饜乎腥腐古道久其弗繼兮吾惕焉為此懼何美人
之好修兮獨與余其同心懷余以厚德兮遺余以好音
世固有同居而弗察兮何千里而能同亂淞江之滔滔
兮涉遠道以相從靚清揚之信美兮懷盛年而莫當子

濯足於東海兮晞髮乎扶桑吸沆瀣以為飲兮餐朝霞
以為糧披列星之粲爛兮抱明月之夜光駕青雲而高
馳兮鳴和鸞之鏘鏘擾蒼龍使挾輶兮服白虎以驅不
祥願發軔其勿亟兮聊弭節而抑志指黃昏以為期兮
夫孰遠而弗至亂曰鹿鳴呦呦猶求友兮曾謂斯人不
如物之知兮獨行無儔吾將與子為類兮

紈扇賦

炎暑時至陽鳥怒飛金石為流白汗沾衣候吹纖條延

爽南扉玉枕徒設桃笙安施旁皇躑躅不知所為於是
裂輕紉兮似雪製圓扇兮如月光搖懷袖涼生毛髮起
遐想於青蘋引清颼於天末蕭然襟帶淒其絺葛醒人
肌骨裨歆如脫須臾或離中腸為熱殆造物者欲解民
之愠假人力以為之不然豈天時之可奪也復有題詩
欣賞因書奇絕障輕塵以寄恨揚仁風而言別或畫乘
鸞之女或誤成蠅之筆白羽離裊而自愧蒲葵比方而
知劣及乎商氣應厥民夷玉露降兮百草金風生兮桂

枝羅衣重拂秋蘭復非孤螢冷照寒螢暗啼棄捐篋笥
綢繆網絲班姬形中道之怨江淹賦零落之詩嗟夫用
舍有時出處有宜惟人亦爾於物奚疑彼狐貉之御冬
豈當暑而亦悲苟行藏之任道願踈時乎安之伊聖賢
其不可見兮之二人又何知

修竹賦

猗猗修竹不卉不蔓非草非木操挺特以高世姿蕭灑
以拔俗葉深翠羽幹森碧玉孤生太山之阿千畝渭川

之曲來清飈於遠岑娛佳人於空谷觀夫臨曲檻俯清
溪色侵雲漢影動漣漪蒼雲夏集綠霧朝霏蕭蕭雨沐
裊裊風披露鶴長嘯秋蟬獨嘶金石間作笙竽誰吹若
乃良夜明月窮冬積雪掃石上之陰聽林間之折意參
太古聲沉寥汰耳目為之開滌神情以之怡悅蓋其嫵
秀碧梧託友青松蒲柳慚弱桃李羞容歌籊籊於衛女
詠淇澳於國風故子猷吟嘯於其下仲宣息宴乎其中
七賢同調六逸齊蹤良有以也又况鳴嶰谷之鳳化葛

陂之龍者哉至於虛其心實其節貫四時而不改柯易
葉則吾以是觀君子之德

赤兔鵲賦

皇慶元年上賜大都留守臣伯特穆爾白兔鵲一翎
翩皓潔白雪同皎至延祐元年凡三籠而毛羽變赤
光采艷奕異於尋常搏擊勇鷙加於疇昔雖老於五
坊者亦不知其所以然豈若君子進於德以潤身者
耶公既寫其形質集賢侍讀學士臣趙孟頫為之賦

其辭曰

猗鷲禽兮出金門
賜貴臣兮示殊恩
色霜雪兮耀前軒
解條鋌兮縱平原
狐兔駭兮不及奔
歷年歲兮羈如璫
粲晨霞兮炫朝暎
剛氣勝兮肆飛騫
德愈進兮義愈敦
炯雙眸兮睨乾坤

松雪齋集卷一

欽定四庫全書

松雪齋集卷二

元 趙孟頫 撰

五言古詩

古風十首

詩亡春秋作仲尼蓋苦心空言恐難託指事著以深大
義炳如日萬古仰照臨鳳鳥久不至楚狂乃知音愁來
不得語起坐彈吾琴

周衰有戰國紛紛極荆秦黃金聘辯士駟馬迎從人朝
為刻骨讐莫作歃血親終然智力屈奉身俱入秦

相如賦大人出語頗奇怪飄然凌雲意過耳誠一快誇
言入無際自覺塵俗隘安知翻成勸何用名為戒

自有天地來蓬萊幾清淺人生空皓首舉世誰得見瑤
臺在何許渺渺烟波遠方舟不可渡使我空展轉

絕代有佳人被服綺與紈蛾眉秀聯娟吐詞馥若蘭清
歌啓皓齒瑤琴發哀彈一彈再三歎聽者涕沈瀾借問

誰家子為言本邯鄲

秋風吹庭樹故葉紛以隊明月耿夜長草蟲促經緯四
序苦不淹少壯何足貴展轉復展轉寤辟不能寐昔為
閨中秀今作市門鄙豈無膏與沐甘心得憔悴

山深多悲風日暮愁我心玄雲降寒雨松柏自哀吟人
生百年後奄然閔重陰念此每不樂天路何由尋仙人
倥傯輩消搖在青岑奈何不爾思委命重黃金

海山有奇樹粲粲珊瑚枝由來植物性無脛可推移如

何石氏子樹之白玉墀洛陽經幾戰金谷久荒夷空令
千載下聞者為傷悲

烈風號枯條落葉滿周道原野何蕭索川流亦浩浩離
居日以遠懷思令人老功名會有時生世苦不早顧瞻
靡所騁憂心愁如擣

浮雲何方來不知竟安之飄飄隨風去汗漫以為期自
昔功名士往往事驅馳白駒空谷中誰能加繫維皎皎
難見容翻受世妍媸虛名誠無益不見斗與箕

有所思

思與君別來幾見芙蓉花
盈盈隔秋水若在天一涯
欲涉不得去茫茫足烟霧
汀洲多芳草何心采蘅杜
青鳥翱雲間錦書何時還
君心雖匪石祇恐彫朱顏
朱顏不可仗那能不惆悵
何如雙翡翠飛去蘭苔上

和子俊感秋五首

秋至倏廿日天宇豁然清
涼颼旦夕至林木發商聲
良辰不我與慨然心自驚
古人久已逝念之動中情
苦心

嬰世患只博身後名今我將無同庶復得此生

明月照北林翩翩棲鳥翻虛室當靜夜幸絕人事喧念
子已獨寐無人相與言吾生性坦率與世無競奔空懷
丘壑志耿耿固長存何由持此意往與嚴鄭論

披衣步中庭仰視河漢白寓形天地內聊復度朝夕仲
尼諒非愚皇皇不暖席履運有異同喟然慨今昔丘園
豈云遠終當期屏跡日月馳驚去鳥影飛過隙歸休曷
不早胡為受形役

晴雲暖高宇輕颺弄微涼天氣政爾佳撫已徒自傷今
日非昨日荏苒歎流光幾見春鳥鳴已復啼寒蛩一時
良亦短萬世則為長

白露泣然隊草木日以彫閒居無塵雜日薄風脩脩登
高寫我心葵扇欲罷搖感時俯逝水回睇仰層霄松喬
在何許高蹈不可招願言從之遊懷古一何遙

詠懷六首

皇天分四序寒暑互推移如何當秋夕愴怳令心悲寒

蟬寂無聲翔雁紛南飛西風一披拂草木失華滋不惜
鵲鳩鳴但傷衆芳萎徘徊白露下鬱邑誰能知

美人涉江來遺我雲和琴朱絲絙玉軫古意一何深長
歌和清彈三歎有遺音逸響隨風發高高不可尋奈何
俚俗耳抑揚悅哀淫此道棄捐久沉吟獨傷心

明明秋夜月流光照羅帷隱憂從中來起視夜何其草
蟲催杼軸札札鳴聲悲良人遠行役萬里歸無期子髮
已曲局膏沐久不施迴身入閨房愁思當告誰獨有中

宵夢遙遙為君馳

蒼天高無極大川廣且深下有沉潛魚上有冥飛禽先
民莫不逸我獨懷苦心抒情作好歌歌竟意難任

陵茗何青青上蒙松與柏一時良亦好歲晚竟誰得人
無金石壽生年不盈百何為慕榮祿抱此長戚戚

菽粟在中原夫人能采之無為思百憂歡樂當及時今
日忽已過來日非所知有酒且復飲既醉歌令儀

詠逸民十一首

自古逸民多矣意之所至率然成詠聊與同好時而歌之耳

鳳凰覽德輝奮翅翔千仞矯矯孤竹子求仁斯得仁於心有不厭視世等埃塵俯仰志不屈又不辱其身聖言一以宣萬古無緇磷誰言首陽山卓與嵩華鄰采采山中薇愧爾肉食人

勞生本非情祿仕吾不苟古來畎畝間亦有沮溺叟依依耦畊心千載思尚友中道世所難狂狷誠足取如何

絕代下相知不忠厚仲尼不復作斯懷向誰道

驅車秣駕馬吾將適齊國聞有魯連子倣儻好奇畫一
談秦師走再說聊城拔功成不受賞高舉振六翮布衣
終其身豈復為世役茫茫千載遠安往訪遺跡躊躇東
海上向風長太息

四時相代謝榮耀何足恃瓜田引新蔓不見桃與李知
士解其會遇坎當復止邵生故秦吏乃亦睹茲理賢哉
感我懷三歎不能已

子真初亦仕歲晚乃逃之區區南昌尉上疏忘其卑忠
言不見用耿耿當告誰飄然棄妻子終身與世辭抱關
甘貧賤所貴莫我知至今九江墳清風激羣黎神仙信
茫昧此士獨不疑孤雲無定在逝水何時歸遐思一矯
首悵望無由期

悠悠空山雲泱泱長江流廊廟意不屑山澤聊淹留故
人在天位高步追巢由豈曰子無衣辛苦被羊裘東京
多節義之子乃其尤窮居雖獨善輔世豈不優

汪汪千頃波不為人濁清道周言行表蕩然無得名誰
言牛醫兒乃是人中英當時無間言後世流德聲思之
不可見使我鄙吝萌淳風久已漓此意豈復存時無君
子者雖賢寧見稱

南州有高士食力事耕稼優游聊卒歲不矯亦不隘大
木行欲顛緋纒豈足賴何為諸老翁棲棲不遑舍斯言
非無見明哲自高邁誰能縣一榻待子來稅駕

鹿門何亭亭下有避世賢鳳雛隱中林臥龍蟠其淵一

朝起高翔斯人獨深潛功名不可為我志久已安一聞
耆舊傳使我心悠然

黃鵠羽翼長一舉思千里幼安本中原乘桴走東海舉
世方尚同遠引存吾志流風漸異俗敦禮化鄰鄙子魚
平生友胡乃不相委

塵事非所便田園久見招歸來三徑中蔚蔚長蓬蒿雖
有荷鉏倦濁酒且自陶茫茫大化中委運將焉逃唐虞
去已遠由來非一朝粲粲霜中菊采采忘其勞

歲暮和剛父雜詩四首

窮陰結嚴寒玄景閤微陽蘭蕭同憔悴隱惻我中腸美人彈玉琴繼之歌清商絃急聲未已知子意獨長陽春時未至此曲徒悲傷

美玉處荆山林木生光輝采之獻凡目棄置亦其宜如何和氏子涕泣有餘悲古來賢達人不為毀譽移被褐懷至寶寧懼不我知待賈未能信韞藏誠可師

驚飈吹白日流光忽蹉跎登山采衆芳荆榛一何多迷

途幸未遠迴車且委蛇黃鵠志四海雀鸚將如何
肥馬黃金鞍輕裘華且鮮竭來從橫馳意氣何翩翩朝
為人所慕夕已為世憐此道固應爾禍福非虛言生當
稱善人死當謚為賢勿羨夸毗子狂馳終百年

贈道隆上人

辟俗無所之步尋招提遊顏垣蔽蓬艾破屋壞不修老
僧俗念淨靜坐百不憂浮雲有逸態止水無急流乃知
我輩人苦受世累因竭來得此地稍覺心休休窗前幾

藜菊青蕊亦已稠愛之不忍采留作山房秋何當移四
松伴汝成清幽南岡與北嶺路近頗易求他年風雨夜
來聽龍吟愁

遊南山憩山下人家和人韻

驅馬南山陽下馬望絕巘解衣坐盤桓言就蓬廬偃非
無攀援力興盡自應返天高暄風息木落歲華晚勢阻
乏遐觀趣得心自遠不有君子詞何用抒繾綣

東郊

晨興理孤榜，薄言東郊遊。
清風吹我衣，入袂寒飈飈。
幽花媚時節，弱蔣將依。
寒流山開碧，雲斂日出白。
烟收曠望得所懷，欣然消我憂。
中流望城郭，蔥蔥佳氣稠。
人生亦已繁，惠養要須周。
身不願餘尚，恐乏所求且。
當置勿念，乘化終歸休。

春後多陰偶成三首用復無逸來貺

日出晨景澹，散髮步中庭。
仰見濯濯柳，春風暢人情。
茲晨豈不佳，誰能定陰晴。
人生亦良脆，疲勞竟何營。
萬事

可撥遣舍道焉求成

臥起向北窗一室可棲遲
取詩三百篇一一絃歌之古
道豈為遠先師不吾欺
嘉我有良朋所志共在茲
適意聊娛樂過此非所知

仲春忽已過四序隨流波
水深不可厲苦雨一何多
田園頗在念春事今如何
沉憂亦無益言笑復言歌

曉起川上贈友

明發不能寐獨步柳陰中
秋色方浩蕩晨光乍曛曠
爍

爍川上日蕭蕭樹間風葛巾吹欲墮纖絳已無功感彼
歲月駛悟此人世空悠悠竟何補山林情所鍾終期抗
高志駕言從赤松

遊弁山

我欲到斯境歲月良已深今晨為茲遊疇我夙昔心悠
悠岡坂長慘慘風雲陰微雨迫短日飄然灑衣襟屢欲
還吾駕去意復難任逍遙得所止林竹自蕭森素琴不
須彈山水有清音邈在樊籠外塵想何由侵况懷冥絕

理去此將焉尋他山豈不好聊爾非所欽

二月二日尊經閣望郊外山水二首

朝登西北樓遐景舒我懷
熹微晨光動窈窕春增華
草木罕悴色山川一何佳
悠然斜川意千載與我諧
及茲春服成言詠樂無涯
此理將不泯棄之良可嗟

日出羣動作鷄犬亦復喧
湫湫孤舟發翩翩棲鳥遷
先師有明訓政在善利間
結髮事詩書於今益可憐
况茲去古遠淳風未易還
吾行亦聊爾一覽可忘言

次韻舜舉四慕詩

子哲有高志悠然舞雩春接輿諒非狂行歌歸隱淪周
也實曠士天地視一身去之千載下淵明亦其人歸來
北窗裏勢屈道自伸仕止固有時四子乃不泯九原如
可作執鞭良所欣

春思

春柳黃如鶯春風揚綠波美人在何許忽若阻山阿攀
條弄白日常恐歲蹉跎懷思鬱不舒佳期將奈何良辰

難驟得臨風浩歌

雜詩

四時更代謝物化常隨之
春華曾幾何歲月忽如茲
嚴風動高林百草具已萎
人生况有役憂患乃其宜
棄捐勿復念出入由化機
安得松喬術邈與世相違

寄題右之此靜軒

卜居無喧寂尚論心所宗
山林苟不靜亦與朝市同
聞君南窗下寄傲樂無窮
曲肱有餘趣戰勝紛華中
好風

從何來吹子庭前松清琴時一彈濁酒尊不空頗恨道
里賒不得往相從人事矧好乖我心何時降

廉山曉行

曳杖行墟曲蒼茫曉色分凝霜被原隰葛屨非昔聞新
松夾道周宿草冒高墳日月迭而逝死生安足云輕舟
沿寒流悵望廉山雲世固不可辟斯人本同羣緬焉心
如結詠言著斯文

奉和本齋先生首夏即事

天道雖不言坐覺四時行
藹藹庭前陰熒熒枝上榮
閒居有真趣曲肱寄餘情
仰視浮雲翔俯聆時鳥鳴
道勝心自怡松喬可齊齡
惜哉無旨酒為公稱兕觥

贈趙虞卿

客從北方來逍遙江湖間
顧影空自愛不見欣戚顏
弄秋去已遠神觀一朝還
惜無雙白壁慰子行路難
翩翩雲中鶴孤高杳難攀
長懷紫霞客引袂入名山

題董源溪岸圖

石林何蒼蒼油雲出其下山高蔽白日陰晦復多雨窈
窕溪谷中遭回入洲渚冥冥猿狖居漠漠鳬雁聚幽居
彼誰子孰與玩芳草因之一長謠商聲振林莽

贈別夾谷公

驅馬原隰間經時不遑休昔來日在斗今去麥已秋王
事有埤益宴安非所求翩翩晨風翼一舉逝莫留誰令
匏瓜繫自懷離別憂

青青蕙蘭花含英在中林春風不披拂胡能見幽心相

去千里餘會合大江潯促席談自古知我一何深此別
雖非遠懷思渺難任公其愛體素尚無金玉音

題舜舉小隱圖

有水清且泚洄洑亂石間樂哉三子者在澗歌考槃流
波牽弱縷輕颺動文竿信無吞舟魚我志匪魴鰈勿言
隱尚小神情有餘閒高士不可見古風何時還

趙村道中

朝出南郭門遙指西山陰馬蹄與石鬬宛轉愁我心溪

谷莽回互寒風振穹林黃葉灑我衣巖泉走哀音淒淒
霜露降窮思浩難任人生亦何為百年成古今華堂昔
燕處零落歸丘岑况復不得保悲來淚沾襟

昔年干戈動兵塵暗三吳長江已無險智勇亦難圖築
壘依平山謀國一何愚楨榦羣林空遺址莽丘墟至今
蓬蒿下猶有白骨枯天陰萬鬼哭慘慘荒山隅興亡自
有數不敢問何如獨憐野菊花立馬為躊躇

奉酬戴帥初架閣見贈

仙人海上來遺我珊瑚鈎晶光奪凡目奇采耀九州自
吾得此寶晝玩夜不休生世勿恨晚及與斯人儔惜哉
無瓊玖可以結綢繆世德日下衰古風向誰求蛾眉亦
何有空受衆女仇適俗固所願違已良足憂感子贈言
意再拜涕泗流安得騎騏驎從子以遠遊

吾愛戴安道隱居絕埃塵彈琴聊自娛書畫又絕倫豈
無召我者已矣非所欣昔我道剡中山川自清新是時
夜雪霽懷哉見其人常欲以暇日慷慨為寫真之子有

祖風千里響然臻我從蘇李後敢言筆墨神坐之盤石
上俗物不得親微君動高興此意當誰陳

桐廬道中

歷歷山水郡行行襟抱清兩崖東滄江扁舟此宵征臥
聞灘聲壯起見渚烟橫西風林木淨落日沙水明高旻
衆星出東嶺素月生舟子櫂歌發含詞感人情人情苦
不遠東山有遺聲豈不懷燕居簡書趣期程優游恐不
免驅馳竟何成我生悠悠者何日遂歸耕

張詹事遂初亭

青山繚神京佳氣溢芳甸林亭去天咫萬狀爭自獻年
多嘉木合春晚餘花殿雕闌留戲蝶藻井語嬌燕退食
鳴玉珂友于此終宴鐘鼓樂清時衣冠集羣彥朝市塵
得侵圖書味方遠紛華雖在眼道勝安用戰初心良已
遂雅志由此見何事江海人山林未如願

送周正平學士致仕還里

闕吏晨啓門僕夫戒首途祖道京城南喜色動闔閭仕

宦非徒榮出處貴合義公今雖未耄進退有餘地高蹈
激流俗清風聳朝廷增秩仍繼祿聖明優老成逍遙桑
梓間年高德彌邵紅顏醉春酒白髮照晴昊兩疏真勇
決四皓甘隱淪漢史不專美古今凡幾人青牛當南游
紫氣已先路我欲強著書懷哉未能去

寄鮮于伯機

廊廟不乏才江湖多隱淪之子稱吏隱才高非衆鄰脫
身軒冕場築屋西湖濱開軒弄玉琴臨池書練裙雷文

榮周鼎鹿鳴娛嘉賓圖書左右列花竹自清新賦詩凌
鮑謝往往絕埃塵我生少寡諧一見夙昔親誤落塵網
中四度京華春澤雉歎畜樊白鷗誰能馴

送程子充運副之杭州

鹽為生民食日用猶水火雖非飢所急一日無不可但
令商賈便那復愁國課數年人壞法貪欲肆偏頗利多
歸私室民始受鹽禍爾來又計口強致及包裹摧酷窮
滴瀝征商劇遮邏東南民力竭此事非細瑣朝家更政

金匱要略卷二
化選擇堪負荷君為尚書郎精白色嗟嗟明當戒行李
往理吳越柁祝君無別語編戶要安妥湖山多勝處亦
可供宴坐談笑尊俎間佳聲滿江左

贈茅山梁道士

名山標句曲秀嶺蔚層雲層雲散浩彩中有三茅君度
世三千秋流芳浩無垠丹光耀朱陽琴心傳玉文司命
播萬物發蒙導人羣學道得曠士采真遺塵氛贈我書
一編清謠吐奇芬筆耕亦已勤寸田要鋤耘靈臺聳絳

闕黃雲覆氤氲內觀神自照衆言一何紛平生山林意
獨往乃所欽攀援桂樹枝采擷芝蘭薰靜與木石居遊
則侶麋麇松柏無冬夏烟霞自夕昕軒冕或桎梏綺語
徒羶葷大道返爾朴至哉吾師云冥冥紫霞想湛言久
不聞聆我歌洞章判然仙凡分

罪出

在山為遠志出山為小草古語已云然見事苦不早平
生獨往願丘壑寄懷抱圖書時自娛野性期自保誰令

墮塵網宛轉受纏繞昔為海上鷗今如籠中鳥哀鳴誰
復顧毛羽日摧槁向非親友贈蔬食常不飽病妻抱弱
子遠去萬里道骨肉生別離丘隴缺拜掃愁深無一語
目斷南雲杳慟哭悲風來如何訴穹昊

次韻齊彥學士中秋雨後翫月

臥疴媿微官俯仰百憂集安知中秋至但見明月出蕭
蕭雨新已涼氣澄霽夕青旻羅疎星燦若珠與璧小蟲
鳴草根萬物皆自適而我獨何為矯首望南北愁來無

端倪撥去終不釋人生莫不樂杯酒會鄰戚高歌雜清
唱起舞曼鳴瑟閉戶且復眠空尊何由酌

秋日錦櫻為繼卿作

灼灼庭下花霜餘發春妍衆卉方具腓穠芳獨嫣然主
人遠方來一笑清尊前植物豈無情有開容必先造化
寓深意嘉與後人傳

聽姜伯惠父彈琴摩阮

姜子早聞道澹然遺世榮蓺花有生意焚香無俗情時

抱琴與阮彈作松風聲疇昔江湖間久已知子名安知
十年後一笑成合并是邦山水秀照人肌骨清願子石
泉上為鼓一再行因之洗我耳遂欲濯塵纓

題洞陽徐真人萬壑松風圖

謾謾松下風悠悠塵外心以我清淨耳聽此太古音逍
遙萬物表不受世故侵何年從此老辟穀隱雲林

自釋

君子重道義小人貴功名天爵元自尊世紛何足榮乘

除有至理此重彼自輕青松與蔓草物情當細評勿為
蔓草蕃願作青松貞

禱雨龍洞山

蒼山如犬牙細路入深谷絕壁千餘仞上有凌雲木陰
崖不受日洞穴自成屋蕭森人跡少蒼蔚獸攸伏雲林
互隱映澗道相迴復翔禽薄穹霄鳴鳥響岩曲臨橋濯
清颺汲井漱寒玉神物此淵潛愆陽有祈祝風清慙善
教吏懦恥厚祿慙懷塵外想獨徃疑有悟過幽難久居

濟勝乏高躅策馬尋故蹊歸樵相追逐

送石仲璋

霜風何淒厲蘭蕭同枯萎念此鼻為酸惻愴中心悲由
來無醜好衆女嫉蛾眉數畧困巨魚鹽車厄天騏況復
值怨仇貝錦成禍機俯首無所訴菹醢聽所為向非知
已者雖死誰明之君子有行役後會在何時欲別不敢
往瞻望涕漣漣援筆撫我心為公吐此詞

題桃源圖

戰國方忿爭，嬴秦復狂怒。冤哉魚肉民，死者不知數。斯人逃空谷，是殆天所恕。山深無來逕，林密絕歸路。艱難苟生活，種蒔偶成趣。西鄰與東舍，雞犬自來去。熙熙如上古，無復當世慮。安知捕魚郎，延緣至其處。遙遙千載後，緬想增慨慕。即今生齒繁，險絕悉開露。山中無木客，川上靡漁父。雖懷隱者心，桃源在何許。況茲太平世，堯舜方在御。干戈久已戢，老幼樂含哺。田疇畢耕耨，努力勤藝樹。毋為問迷津，窮探事高舉。

題歸去來圖

生世各有時出處非偶然淵明賦歸來佳處未易言後人多慕之效顰惑媼妍終然不能去俯仰塵埃間斯人真有道名與日月懸青松卓然操黃華霜中鮮棄官亦易耳忍窮北窗眠撫卷三歎息世久無此賢

題李伯時元祐內殿五馬圖黃太史書其齒毛

五馬何翩翩蕭灑秋風前君王不好武芻粟飽豐年朝入閭闔門暮秣十二閑雄姿耀朝日滅沒走飛烟顧盼

增意氣羣龍戲芝田駿骨不得朽託茲書畫傳誇哉昭
陵石歲久當頽然

酬滕野雲

滕君本臞儒肝膈足清氣賦詩多秀句徃徃含古意大
誇江山美一洗塵土翳平生有詩癖得句時自憙耒耜
荒蕪甚枯澀常內媿錦綉忽墮前令我喜不寐功名亦
何有富貴安足計唯有百年後文字可傳世雪谿春水
生歸志行可遂閒吟淵明詩靜學右軍字但恐君未聞

書成無由寄

述太傅丞相已延功德

興廢本天運輔成見人庸與地久以裂車書會當同先
帝昔在御如日行虛空六合仰照耀一方顧顓蒙授鉞
得人傑止戈代天工鐵馬浮渡江坐收破竹功草木紛
震動山川變鴻濛地利不復險金城何足攻市廛易肆
憂兵無血刃紅孰能年歲間我國究始終老稚感再生
遺黎志困窮歸來一不取匹馬走北風九域自此一益

見聖世崇大哉先帝仁允矣丞相忠嗟我始弱冠弗獲
拜此公作頌歌元勲因之寫吾衷

送文子方調選雲南

我友文子方其人美如玉高談動卿相惠利厚風俗文
章多古意清切綠水曲紛紛鳬鷺羣見此摩霄鵠今當
使西南萬里道邛蜀銓衡非細事賢俊要甄錄遠人待
子來飢者望菽粟賢勞亦常事但恐期程促馬嘶晨當
行草長春正綠執手臨歧路使我空躑躅

吳真人盧溝雨別圖

驅馬上河梁執手遠別離
遠別數千里臨分各相思
山川一何悠去去勿復遲
高堂有雙親黃髮映龐眉
還家拜堂下置酒作兒嬉
却歸見天子忠孝兩無虧
人生如公少致身貴及時
此行將未已親壽當期頤

高氏謹節堂

先聖有明訓見諸庶人章
少小誦習之白首不敢忘
高子躬孝弟養親在高堂
蕭公三大字岌岌端且莊
對之

銘座右凜然肅冠裳謹身用始節節用乃無荒斯言非
虛語旨遠味自長守此期勿失善積有餘慶

題耕織圖二十四首奉懿旨撰

耕正月

田家重元日置酒會鄰里小大易新衣相戒未明起老
翁年已邁含笑弄孫子老嫗惠且慈白髮被兩耳杯棬
且羅列飲食致甘旨相呼團樂坐聊慰衰暮齒田硯藉
人力糞壤要鋤理新歲不敢閒農事自茲始

二月

東風吹原野地凍亦已消
早覺農事動荷鋤過相招
遲遲朝日上炊烟出林梢
土膏脈既起良耜利若刀
高低徧翻壟宿草不待燒
幼婦頗能家井臼常自操
散灰緣舊俗門徑環周遭
所冀歲有成殷勤在今朝

三月

良農知土性肥瘠有不同
時至萬物生芽蘖由地中
東耒向畝畝忽徧西與東
舉家徃于田勞瘁在爾農
春雨

及時降被野何濛濛乘茲各布種庶望西成功培根利
秋實仰天望年豐但使陰陽和自然倉廩充

四月

孟夏土加潤苗生無近遠漫漫冒淺陂芄芄被長阪嘉
穀雖已植惡草亦滋蔓君子與小人並處必為患朝朝
荷鉏往薅耨忘疲倦旦隨鳥雀起歸與牛羊晚有婦念
將飢過午可無飯一飽不易得念此獨長歎

五月

仲夏苦雨乾二麥先後熟南風吹隴畝惠氣散清淑是
為農夫慶所望實其腹沽酒醉比鄰語笑聲滿屋紛然
收穫罷高廩起相屬有周成王業后稷播百穀皇天貽
來年長世自茲卜願言仍歲稔四海盡蒙福

六月

當晝耘水田農夫亦良苦赤日背欲裂白汗灑如雨
匍行水中泥淖及腰脅新苗抽利劍割膚何痛楚夫耘
婦當饁奔走及亭午無時暫休息不得避炎暑誰憐萬

民食粒粒非易取願陳知稼穡無逸傳自古

七月

大火既西流涼風日淒厲古人重稼穡力田在匪懈郊
行省農事禾黍何旆旆碾以他山石玉粒使人愛大祀
須粢盛一一稽古制是為五穀長異彼稊與稗炊之香
且美可用享上帝豈惟足食人一飽有所待

八月

白露下百草莖葉日紛萎是時禾黍登充積徧都鄙在

郊既千庾入邑復萬軌人言田家樂此樂誰可比租賦
以輸官所餘足儲峙不然風雪至凍餒及妻子優游茅
簷下庶可以卒歲太平元有象治世乃如此

九月

大家饒米麪何啻百室盈縱復人力多舂磨常不停激
水轉大輪磴碾亦易成古人有機智用之可厚生朝出
連百車暮入還滿庭勾稽數多少必假布算精小人好
爭利晝夜心營營君子貴知足知足萬慮輕

十月

孟冬農事畢穀粟既已藏彌望四野空藁結亦在場朝廷政方理庶事和陰陽所以頻歲登不憂旱與蝗置酒燕鄉里尊老列上行肴羞不厭多魚羔復烹羊縱飲窮日久為樂殊未央禱天祝聖人萬年長壽昌

十一月

農家值豐年樂事日熙熙黑黍可釀酒在牢羊豕肥東鄰有一女西鄰有一兒兒年十五六女大亦可笄財禮

不求備多少取隨宜冬前與冬後婚嫁利此時但願子孫多門戶可扶持女當力蠶桑男當力耘耔

十二月

一日不力作一日食不足慘澹歲云暮風雪入破屋老農氣力衰偃僂腰背曲索綯民事急晝夜互相續飯牛欲牛肥芟藁亦預蓄蹇驢雖劣弱挽車致百斛農家極勞苦歲豈恒稔熟能知稼穡艱天下自蒙福

織正月

正月新獻歲最先理農器女工並時興蠶室臨期治初
陽力未勝早春尚寒氣窗戶當奧密勿使風雨至田疇
耕耨動敢不修耒耜經年牛力弱相戒勤飯飼萬事非
預備倉卒恐不易田家亦良苦捨此復何計

二月

仲春凍初解陽氣方滿盈旭日照原野萬物皆欣榮是
時可種桑插地易抽萌列樹徧阡陌東西各縱橫豈惟
籬落間採葉憚遠行大哉皇元化四海無交兵種桑日

以廣彌望綠雲平匪惟錦綺謀祇以厚民生

三月

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶飢
當採桑何暇事遊遨田時人力少丈夫方種苗相將挽
長條盈筐不終朝數口望無寒敢辭終歲勞

四月

四月夏氣清蠶大已屬眠高首何昂昂蛾眉復娟娟不

憂桑葉少徧野如綠烟相呼攜筐去迢遞立遠阡梯空
伐條枚葉上露未乾蠶飢當早歸秉心靜以專飭躬修
婦事儻勉當盛年救忙多女伴笑語方喧然

五月

五月夏已半谷鶯先弄晨老蠶成雪繭吐絲辭紛紜伐
輦作薄曲束縛齊榛榛黃者黃如金白者白如銀爛然
滿筐筥愛此顏色新欣欣舉家喜稍慰經時勤有客過
相問笑聲聞四鄰論功何所歸再拜謝蠶神

六月

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞縑車響遠接邨西東旬日
可經絹弗憂杼軸空婦人能蠶桑家道當不窮更望時
雨足二麥亦稍豐沽酒及時飲醉倒嫗與翁

七月

七月暑尚熾長日弄機杼頭蓬不暇梳揮手汗如雨嚶
嚶時鳥鳴灼灼紅榴吐何心娛耳目往來忘偃僂織為

機中素老幼要幼補青燈照夜梭蟋蟀窗外語辛勤亦
何有身體衣幾縷嫁為田家婦終歲服勞苦

八月

池水何洋洋漚麻水中央數日麻可取引過兩手長織
絹能幾時織布已復忙依依小兒女歲晚歎無裳布襦
不掩脛念之熱中腸朝緝滿一籃暮緝滿一筐行看機
中布計日漸可量我衣苟已成不憂天早霜

九月

季秋霜露降凜凜寒氣生是月當授衣有布織未成天
寒催刀尺機杼可無營教女學紡繭舉足疾且輕舍南
與舍北嘒嘒聞車聲通都富豪家華屋貯娉婷被服雜
羅綺五色相間明聽說貧家女惻然當動情

十月

豐年禾黍登農心稍逸樂小兒漸長大終歲荷鋤鑿目
不識一字每念心作惡東鄰方迎師收拾令入學後月
日南至相賀因舊俗為女裁新衣修短巧量度龜手事

塞向庶禦北風虐人生真可歎至老長力作

十一月

冬至陽來復草木漸滋萌君子重其然吾道自此亨父
母坐堂上子孫列前榮再拜稱上壽所願百福并人生
屬明時四海方太平民無札瘥者厚澤敷羣情衣食苟
給足禮義自此生願言興學校庶幾教化成

十二月

忽忽歲將盡人事可稍休寒風吹桑林日夕聲颼颼牆

南地不凍壑掘為坑溝斫桑埋其中明年芽早抽是月
浴蠶種自古相傳流蠶出易脫殼絲續亦倍收及時不
努力知有來歲不手凍不足惜冀免號寒憂



松雪齋集卷二

欽定四庫全書

集部

松雪齋集卷三

詳校官庶吉士_臣朱理

侍讀_臣孫球覆勘

總校官降調編修_臣倉聖脉

校對官編修_臣曹錫齡

謄錄監生_臣郭文炤

欽定四庫全書

松雪齋集卷三

元 趙孟頫 撰

五言古詩

次韻周公謹見贈

池魚思故淵
檻獸念舊數
官曹困窘束
卯入常盡酉
簡書督期會
何用傳不朽
十年從世故
塵土滿衣袖
歸來忽相見
忘此離別久
緬懷德翁隱
坐羨沮溺偶
新詩使

我和曠里忘已醜平生知我者頗亦似公否山林期晚
歲雞黍共尊酒却笑桓公言淒然漢南柳

清勝池上偶成

竹色雨餘碧蟬聲風際清方池含綠水中有纖鱗行浮
沉各異態亦足悅吾情欣賞方自茲庶復得此生

重用韻

孤花色更媚密竹氣自清懷彼橘中樂偶茲池上行榮
華或傷性賞靜可怡情坐久不成起待得月華生

贈韓定叟

蕭蕭晚雨細淅淅幽叢響爐溫動餘馥研潤生新賞方
欣話款復此丘園想即事可忘憂胡寧困塵鞅

次韻韓定叟留別

季冬寒氣結晨興懍嚴霜越江不可涉欲涉恨無梁飄
飄客衣薄烈烈北風涼會少別何多令人心靡忘相去
數百里東西渺相望豈無琴與書撫心獨彷徨鬢毛各
已蒼目視亦茫茫中年別親友作惡固其常安得傳羽

翼與子俱飛翔

擬古

長夜何漫漫寒難胡不鳴我行在中野霜露上沾纓虎
豹夾路啼熊羆復縱橫我前鬼長嘯我後啼鼃鼃四顧
寂無人北斗高且明天道誠幽遠吾心空屏營

哀鮮于伯機

生別有再逢死別終古隔君死已五年追痛猶一日我
生大江南君長淮水北憶昨聞令名官舍始相識我方

二十餘君髮黑如漆契合無間言一見同宿昔春遊每
擎舟夜坐常促席氣豪聲若鐘意憤髣屢戟談諧雜叫
嘯議論造精覈巍煌商鼎制駟駿漢馬式奇文既同賞
疑義或共析錦囊裝玉軸妙絕晉唐蹟粲然極炫曜觀
者咸辟易非君有精鑒疇能萃奇物最後得玉鈎琯琢
螭盤屈握手傳玩餘歡喜見顏色刻意學古書池水欲
盡黑書記往來間彼此各有得我時學鍾法寫君先墓
石江南君所樂地氣苦下濕安知從事衫竟卒奉常職

至今屏障間不忍覩遺墨淒涼方井路松竹蔭真宅乾坤清氣少人物世罕覲緋袍儼畫像對之淚沾臆宇宙一何悠悲酸豈終極

酬潘提舉

臥病六十日憤憤無一欣時取古書讀那復能知新客從遼東來一見意自親高談極虛無微言合道真遠宦萬里外飄然絕埃塵歸來如老鶴笑視世間人胡為肯顧我扁舟雪溪濱白髮我已老青雲子當伸京師人物

園子往無逡巡而我慵惰久棲遲甘隱淪

新秋

夜久不能寐坐來秋意濃
露涼催蟋蟀月白淡芙蓉
漸覺練衣薄欲將紈扇慵

秋日言懷

暑退草木蘇綠陰秋更繁
玄蟬寂無聲蒼蜚已復喧
四序有代謝人事何足言
塵冠久不彈散髮坐前軒
俛仰歲云莫遲此負朝暄

送姚子敬教授紹興

我友子姚子風流如晉人白眼視四海清言無一塵結
交三十年每見意自新皎皎白駒瘦華髮無緇磷此行
渡浙水言采會稽芹會稽山水勝王謝雅所欣亦有支
許儔迭遞為主賓子往訪遺跡棹船鏡湖濱狂客雖已
去高情自清真以子絕代才數賢可比倫登山復臨水
嘯歌且怡神時時書寄我用慰情相親

述懷

我性真且率不知恒怒嗔俯仰欲從俗夏畦同苦辛以
此甘棄置築屋龜溪濱西與長松友東將修竹鄰桃李
粗羅列梅柳亦清新漸與市朝遠頗覺漁樵親自謂獨
往意白首無緇磷安知承嘉惠再踏京華塵京華人所
慕宜富不宜貧嚴鄭不可作茲懷向誰陳

慶壽僧舍即事

白雨映青松蕭颯灑朱閣稍覺暑氣消微涼度疎箔客
居秋寺古心跡俱寂寞夕蟲鳴階砌孤螢炯叢薄展轉

懷故鄉時聞風鳴鐸

送李仲淵同知睢州

西風吹客衣
秋日明遠樹
蕭蕭班馬鳴
念子明當去
人生貴適意
要津何必據
佐州亦不惡
足展經濟具
峨睂山川秀
文俗盛如故
喜子過我樂
增我羈旅慮
忽忽萬里別
益歎相見暮
此心如天河
隨子西南注

幽獨二首

閒居無與娛
幽獨欣有得
松翁善嘯歌
花女美顏色
人

生亦何為耳目皆幻適我今未半百鬢髮早已白牙齒
復動搖行當為去客且盡須臾歡忘言坐苔石

獨坐不自聊披草尋微徑夕陽在高林籬落有餘映依
依增遠想歷歷生晚聽涼蟬軋鳴箏候蟲擊清磬大小
皆有從雄雌各相應沈吟復躊躇忽覺西山暝

允懷齋

安西皇
甫先輩

小齋深且明中有萬卷書齋中古君子寸田自耘鋤人
生萬善具政當復其初操存貴勿忘道積乃有餘時復

南窗下靜看雲卷舒

送文章甫陝西都事

籍甚潞公孫去為西省客
矯矯國士風
婉婉幕中畫
涇渭寒有聲
終華秋更碧
聊因佐理餘
題詩寄來驛

美人隔秋水

美人隔秋水
咫尺若千里
可望不可言
相思何時已
庭樹多落葉
日夕秋風起
我今年已衰
素髮擁兩耳
回思少年時
容顏若桃李
美人何當來
一笑懷抱洗
未見今

我思既見胡不喜

贈李明道尊師

我遊皆意行仙館欣有遇麻衣皓如雪蓬鬢颯以素懸
知有道者一見乃如故行當還山中清飈送雲馭蒼松
無凡聲石局有生路風雷坐可致龍虎儼訶護空令塵
中人矯首企烟霧

雲林山中

松風太古聲欲寫不可狀仰觀空翠滴俯聽潮音壯豈

惟塵慮滌亦覺神情王平生獨往意老矣天所放翳翳
林竹間山鳥時一唱俗氛雖云遠勿起清淨障

九日當採菊登高古相傳我今值佳節燕坐雲林顛亦
有巖間花青蕊露華鮮采采服九英飲水可長年况茲
霜稻熟刈我山下田一飽無復事了我粥飯禪

題括蒼山成德隱玄洞天

洞天在何許乃近在人間神仙亦人耳仙成厭塵寰冥
冥隱玄洞我我括蒼山卿雲時翳勃赤鳥昔飛翻緬懷

葛玄翁一往不復還餐霞弄明月解纓濯潺湲青芝伺
時生綠蘿共誰攀服食去道遠孤坐亦非丹清歌極窈
渺朱書勒孱顏十年有白鶴飛來啓玄關

題先天觀

對此山水詠使人塵慮消况茲構真館燕坐遠煩聒青
林蔭戶牖素雲冠山椒松風和澗泉雜佩響瓊瑤焚香
玉女降長齋百靈朝仙道本不遠清都亦非遙自嗟衰
莫年頗費猿鶴招安得生羽翰從子以消搖

周南翁悠然閣

青山與高人一見如有約悠然相莫逆無語心自樂凌
虛步丹梯攬秀有高閣應同九臯鶴翱翔在寥廓

夏日即事呈六兄

下簾却畏日開軒納清風雖無政事關亦見好惡公此
心如白壁聊與世容容有兄遠方來一笑杯酒同我雖
不解飲預恐尊中空呼兒更往沽勿使歡意窮

送謝伯琰

太史院
都事

纂纂衆實繁
嚙嚙蟬聲稠
炎暑尚爾熾
西風猶未秋
憐子觸熱行
不憚道里修
棧閣天下險
錦城西南陬
過家因上冢
聖恩賁林丘
鞍馬雖驅馳
於義不可留
子材瑚璉器
用世美且周
明時方任賢
驛程難久遊
去去早言還
庶解離別憂

偶記舊詩一首

在德清別業時作

春情浩無端
野興欣有矚
山光豔桃李
澗影寫松竹
古來巖穴士
白駒在空谷
幽鳥何處來
啼破林烟綠

遊幻住菴

雨後溪水溢黃流行地中輕舟何迅邁沿波兼順風碧
蘆幹始長柔桑葉已空瞬息抵山曲窈窕微徑通青林
夾道周流泉響幽藪多慚衆衲子前路相迎逢禪居新
結構斧斤未輟工雙閣出塵囂六窗自玲瓏久矣厭城
市飄如脫樊籠妙香清鼻觀新鶯驚耳聾汲水插山花
開牖納松風經聲出廊廡寂然聞鼓鐘蔬食欣一飽亦
與膏粱同緬懷老尊宿燕坐毗盧峰塵緣苦未斷無由

往相從一宿返歸棹迴望但青蔥

清河道中

揚舲清河流開蓬素秋曉
攔斑被厓花委蛇順流藻天
清去鴈高野濶行人小故園
歸有期客愁淨如掃

夏至

夏至午之半一陰已復生
堅冰亦馴至顧豈一朝成萬
物方茂悅安知有雕零君子
感其微慟哭幾失聲

庭前松

手種庭前松於今二十年清風時過之我琴不須絃高
標傲歲晚秀色凝空烟有懷貞白君世豈知其玄

七月六日承貞居先生遠寄周鐘銑間有文象鳧
之形則考工記所謂鳧氏為鐘者也擊之與夷則
合而是日又適立秋古物之來豈偶然哉輒成小
詩拜貺之辱

故人賞我趣遺我鳧氏鐘制與周禮合試叩聲春容是
日新秋節夷則還為宮懸之西楹下浮磬儼在東金石

互相應間以絲與桐八音雖未備古樂將無同鼎尊鐸
解卣羅列見古風揖讓於其間令我懷周公作詩報嘉
貺庶以開羣聾

閒居

荒庭蕪弗治翳翳草與筠池魚出娛客林鳥來依人閒
居意自足何者為戚欣況於黃卷間時與聖賢親

病中春寒

仲春尚寒氣林花無豔滋散裘擁衰疾風雨何淒其始

雷發東隅霽牖陽光披微風草際動落英池面移幽禽
變圓吭遊魚揚細鬣我病自此愈泛舟溪水湄小輿指
南蓋短筇問東毗機心不復有高蹈農與義

松澗詩贈丁師善

青松上參天下有幽澗泉高人居其間萬慮不至前讀
書得妙趣視世等浮烟胡為舍此去杖策走日邊要當
陳忠益民瘼會有痊却歸弄泉石靜聽松風眠

興中府某氏見山樓

東北有高樓迢遞數十尺朝霞映窗牖浮雲來几席莽
蒼一望間翠律千峰碧青山何處無所見多迫迳偉哉
賢無閤周禮載簡冊我雖身未到心想已可索但惜道
里賒處地遠且僻嘉彼樓居子不受世故役愛山如愛
客相對樂晨夕應笑平地人塵埃坐充斥

贈恢上人

晨坐古松下有僧來叩扉松花落金粉細細點春衣折
松當塵尾相對澹忘機湯休不可作政索解人稀

露坐

露坐夜將半澹然無所為草根蟲鳴歇松梢螢度遲城
市多塵雜令人心不怡茲丘亦可老已與白雲期

題黃華為其父寫真

仙人紫霞衣獨坐古松間玉色映流水不動如丘山平
生黃華老得意每相關九原如可作與君相對閒

題先賢張公十詠圖

張先子
野之父

吳興瀟灑郡自古富人物溪山映亭榭尊俎照華髮當

時盡簪地蓁莽久蕪沒空餘詩語工不共芳草歇撫卷
想勝風冠佩其敢忽先民不可見惆悵至明發

犀浦遐觀詩

男子四方志蜀都天下奇李侯并門豪杖節鎮坤維愛
此雪山雄卜宅犀浦湄錦城既云樂焉用還家為遺像
開生面清風凜英姿應同武侯廟人懷千古思

吳俊卿義塾

禮義生富足為富或不仁誰能如吳君捐已以惠人開

塾延師儒聚書教比鄰豈徒名譽美要使風俗淳人物
方渺然作養當及辰文章雖致身經術乃新民宣公相
業著輔子理學醇二賢鄉先正千載德不泯吳君真盛
舉勉哉繼前塵何當襲春服從子語水濱

寄題杜尊師白雲菴瓊秀亭

白雲從何來乃在計籌山山中古仙伯翱翔白雲間城
市多踞塵山林幽且閑結屋松竹裏開窗泉石邊清齋
誦道德焚香降神仙俯仰皆自得洗心游泰玄稅駕往

從之規買山下田藝藥掃白髮栽桃映紅顏庶幾林下
意期了區中緣丹成從師去笑拍洪崖肩

瓊山發天秀珠泉表地靈柔荑吐丹葩喬林標絳英酌
醴吸冲和汲澗漱甘清石門開洞府木龍走巖窟清飈
一時至四座浮幽馨闐風何必遠世塵空自冥從遊當
有期淹留詎無成左手擷紫芝右手采黃精振衣陟崇
岡遐觀散神情長嘯烟霧裏滿空鸞鶴聲

七言古詩

楊堅州治水歌

秋水至今大河溢金隄決兮流漂疾田疇汨兮為民憂
魚鼈肆兮地上游誰能治水兮徵楊侯具畚鍤兮萬人
聚勢悍急兮不可以禦問河伯兮何所怒歲不登兮民
且窶侯精誠兮感神明赤蛇蜿蜒兮昭厥靈奠桂酒兮
薦芳馨神攸歆兮隄防成水復故道兮民載寧天子聖
兮地道平萬歲千秋兮揚頌聲

題錢舜舉著色梨花

東風吹日花冥冥繁枝壓雪凌風塵素羅衣裳照青春
眼中若有黎園人攀條弄芳畏日夕只今紙上空顏色
顏色好愁轉多與君沽酒花前歌

兵部聽事前枯柏

庭前枯柏生意盡枝葉乾焦根本病黃風白日吹沙塵
鼓動哀音亂人聽嗟哉爾有歲寒姿受命於地獨也正
雨露雖濡心自苦鳳鳥不來誰與盛豈無松檟在山阿
只有蓬蒿沒人脛我生愧乏梁棟才浪逐時賢繆從政

清晨騎馬到官舍長日苦飢食還併簿書幸簡不得休
坐對枯槎引孤興人生何為貴適意樹木託根防失性
幾時歸去臥雲林萬壑松風韻笙磬

題西谿圖贈鮮于伯機

山林忽然在我眼攬袂欲遊嗟已遠長松謾謾含蒼烟
平川茫茫際層巘大梁繁華天下稀走馬鬪雞夜忘歸
君獨胡為甘寂寞坐對山水娛清暉西谿先生奇崛士
正可著之巖石裏數間茅屋破不修中有神光發奇字

綠蘋齊葉白芷生送君江南空復情相思萬里不可見
時對此圖雙眼明

題二喬圖

長江東來水滔滔誰謂江廣不容刀中有喬家女兒淚
何意師昏隨二豪龍虎方爭欲相啗鸞鳥鍛翮將安逃
不見當時老諸葛獨聘醜婦何其高

題黃素黃庭後此書飄飄有仙氣意其為楊許舊
跡蓋人間至寶伯機所藏也

琴心玉文洞玄玄金鈕朱錦乃汝傳子能得之可長年
黃素縝稟貌且堅橫理如髮約兩邊從有赤道如朱絃
文居其間走玄蛾飛雲卷舒相終始大道甚夷非力使
無為自然有至理誰能精專換骨髓掃除俗塵不瑕穢
目中有神乃識真白玉為軹裝車輪裹以天上翠織成
仙人樓居儼長生鸞鶴翔舞猿輕子能寶之慎勿驚
宮室之中夜自明上清真人楊與許焚香清齋接神女
手作此書留下土千年流傳子為主東方蒼龍右白虎

廉不子求貪不與

戲題出洗馬

齧膝覓駕誰能御
駕蹇紛紛何足顧
青絲絡首錦障泥
鞭箠空勞怨長路
明窗戲寫乘黃姿
洗刷歸來氣如怒
不須對此苦歎嗟
男兒自昔多徒步

送孟仲則遊荆湖兼往襄漢

行路方難子何往
瀟湘洞庭天一方
長江風來浪如雪
荆門木落天雨霜
千金養客不復見
萬里訪舊庸何傷

子才有用未得試牛刀愛惜藏鋒鋌似聞遠遊未渠央
更欲攬轡趨襄陽昔年戰鬪且休息白骨已瘞愁雲黃
伏龍鳳雛在何處鹿門山色還蒼蒼登高弔古一長嘯
萬事慘澹悲中腸人生聚散安可常為君起舞君舉觴
明朝帆影拂浮玉寄言客居思故鄉

烈婦行

至元七年冬邠州軍士劉平之戍襄陽與其妻胡俱
道宿車下平為虎所得胡起追及之殺虎脫其夫吾

聞之中原賢士大夫如此乃為感激慷慨作烈婦行
以歌之

客車何焯焯夫挽婦為推問君將安去言往襄陽戍官
事有程宿車下夜半可憐遭猛虎夫命懸虎口婦怒髮
指天十步之內血相濺夫難再得虎可前寧與夫死毋
與虎生呼兒取刃力與爭虎死夫活心始平男兒節義
有如許萬歲千秋可以事明主馮婦卞莊安足數嗚呼
猛虎逢尚可甯成甯成奈何汝

送高仁卿還湖州

昔年東吳望幽燕長路北走如登天捉來官府竟何補
還望故鄉心惘然江南冬暖花亂發朔方苦寒氣又偏
木皮三寸冰六尺面頰欲裂凍折弦廬溝強弩射不過
騎馬徑渡不用船宦遊遠客非所習狐貉不具綈袍穿
京師宜富不宜薄青衫駿馬爭騰騫南鄰吹笙厭梁肉
北里鼓瑟羅姝妍淒涼朝士有何意瘦童羸馬雞鳴前
太倉粟陳未易糴中都俸薄難裹纏邇來方士頗向用

讀書不若燒丹鉛故人聞之應見笑如此不歸殊可憐
長林豐草我所愛羈勒未脫無由緣高侯遠來肯顧我
裹茗抱被來同眠青燈耿耿照土屋白酒薄薄無葷羶
破愁為笑出軟語寄書妻孥無一錢江湖浩渺足春水
鳬鴈滅沒橫秋烟何當乞身歸故里圖書堆裏消殘年

贈相士

我昔放浪江湖間舉頭開眼看青山安知世故不相舍
坐受塵土凋朱顏髭須已黃行且白亦知人生不滿百

功名富貴非我事但願有酒呼好客錢塘江邊逢少年
兩眼善相口談天封侯食肉骨法異慎勿置我諸公前
江南春暖水生烟何日投閒茗水邊買經相牛亦不惡
還與老農治廢田

謝鮮于伯機惠震餘琴云是許旌陽手植桐所斲
仙人已歸白雲中空餘手植青枝桐根柯盤鬱如蛟龍
一朝霹靂驅雷公烈火半熱隨狂風箕子之裔多髯翁
才氣邁俗驚愚蒙抱持來歸尋國工斲為二琴含商宮

我來自北欣相逢持一贈我為我容自吾得此不敢寐
終夜起坐彈孤鴻下絃清冷上黃鍾轉絃更張涕滿胃
黃虞已遠將無同恨君不識牙與鍾恨我不識瞽與矇
周南大雅當誰從

贈相者

吾聞伯樂善相馬一顧千金長高價何人個儻買權奇
滿眼駑駘居櫪下張君年少目有神走半江湖多閱人
我生瘦悞乏駿骨浪許驕驤防失真連朝春雨今始晴

花枝照眼生春情樓前山色橫翠靄湖上柳黃飛亂鶯
便須沽酒與君飲醉倒花前且高枕懶從唐舉問流年
欲向德翁謀小隱

漁父詞二首

仲姬題云人生貴極是王侯浮利浮名不自由爭得似一扁舟弄月吟風

歸去休

渺渺烟波一葉舟西風木落五湖秋盟鷗鷺傲王侯管
甚鱸魚不上鉤

儂住東吳震澤洲烟波日日釣魚舟山似翠酒如油醉

眼看山百自由

送朱仲陽太平教授

列仙之儒山澤臞手中黃紙新除書教官雖冷實清選
當塗山川如畫圖我生無能百不如何不從君賦歸與
請君為我酹太白矯首南望心煩紆

題李公略所藏高彥敬夜山圖

高侯胸中有秋月能照山川盡毫髮戲拈小筆寫微茫
咫尺分明見吳越樓中美人列仙臞愛之自言天下無

西窗暗雨政愁絕
燈前還展夜山圖

贈吳真人

父封饒國公
母饒國夫人

上清真人天上來
雲收霧斂天門開
手持璽書歸故里
瓊琚玉佩相追陪
堂上老仙千歲壽
喜兒歸來酌春酒
帝命建爾于上公
老仙拜前兒拜後
古來子貴父母榮
今見恩榮萃一門
紫衣玉帶照華髮
金冠瑤簡明朝暎
人間五福誰能備
歲晚寒香滿天地
真人妙行我所知
曾是玉皇香案吏

題額森特穆爾開府宅壁畫山水歌

大山岑嶽摩青天小山平遠通雲烟商侯胃中有丘壑
信手落筆分清妍閨風玄圃元不遠粲爛金碧流潺湲
參差澗谷樓觀起紫紆石路朱橋連松風颼颼響虛閣
棋聲剝啄來羣仙漁歌樵唱渺何許綸巾羽扇清溪邊
高情自有泉石趣涼意不受塵埃纏世間書畫亦豈少
誰能真賞如公賢華堂風日不到處絕勝繡幕空高懸
舉觴酌酒為公壽眼明對此三千年

孤燕曲

燕燕復燕燕孤飛不忍見故雄已作長別離孀雌守節
令人羨昔日雙雙拂烟草十年獨宿梁間藻歎息人間
貞婦少人獨何心不如鳥

題商德符學士桃源春曉

宿雲初散青衫濕落紅繽紛溪水急桃花源裏得春多
洞口春烟搖綠蘿綠蘿搖烟掛絕壁飛流淙下三千尺
瑤草離離滿澗阿長松落落凌空碧雞鳴犬吠自成村

居人至老不相識瀛洲仙客知仙路點染丹青寄輕素
何處有山如此圖移家欲向山中住

秋夜曲

雨聲滴夜清漏長朱簾金幙浮新涼閨中美人動裁剪
故羅衣袂生秋香東鄰剝棗西鄰獲旅館無人念飄泊
餘不潦盡涵清輝芙蓉壓堤怨不歸牆根草綠陰蛾飛
蒲萄架空墮殷玉遙夜露寒生體粟暗蛩棲草鳴不平
無絲經緯空勞促夢魂苦短道苦長萬山深處非吾鄉

玉蟲搖釭螢入屋去雁來魚應可卜醒眼熒熒愁萬斛
孔道輔擊蛇笏

以笏擊蛇有孔公義與段公擊賊同事之鉅細雖有異
正氣憤激生于中偉哉孔公聖人豈豈聽妖邪亂民志
即今槐木一尺強氣象凜凜含風霜子孫守之慎寶藏
絕勝象牙堆滿牀

李氏種德齋詩

一年之計種穀十年之計種木百年種德知何事插架

鱗鱗書滿屋世人責報嗟何速我自無心邀後福日中
為市百賈鬪競逐錐刀蛾赴燭鬻書之利雖云薄要令
舉世沾膏馥為賢為智皆由此耕也未必能干祿他年
種德看成功遠在子孫應可卜

贈張彥古

秋雨新已風日清忽聞剝啄敲門聲出逢麻衣老仙伯
身長七尺雙瞳明平生學道幾半世一見灑灑心為傾
大道無為返爾樸自然有路通長生我今素髮颯以白

卷三
官途久矣思歸耕吳興山水况清絕白雲滿嶺堪怡情
老仙何當從我去小築茅屋依崢嶸還丹已就蓬島近
笑指塵海尋方平

送田師孟知河中府

漢二千石入為相邑令或入為三公聖朝用人亦復爾
予以此賀田河中田侯年少與余友今三十年俱白首
離觴未盡去馬鳴愁向風前折楊柳

趙克敬耘菴

趙子居室名耘菴不以雨暘為旱潦寸田尺宅勤自治
稂莠芟夷嘉穀好平生萬事無助長歲晚所收皆至寶
我託官聯幾一載懷抱於人每傾倒交情雅有古淡風
此意難為輕薄道況我同姓古所敦百世可知宜細考
三十年來如一夢白髮相看今盡老我方告歸理墓田
莫怪賦詩殊草草

燕脂驄圖歌

騏驎驤裒世常有伯樂不生淹棧豆歛見此圖神自王

權奇磊落龍為友，隅目晶熒生紫光。
錦毛錯落蒙清霜，霜蹄蹙踏寒玉響。
霧鬣振動秋風涼，朝浴扶桑騰浩蕩。
莫秣崑崙超象罔，雄姿似隘六合小。
盛氣欲籥浮雲上，嗅塵一歎驚肉飛。
奮迅不受人間鞿，豈惟萬馬羞欲死。
直與八駿爭先馳，只今相者多舉肥。
歎息此圖誰復知，君不見王處冲。
半生隱德真成癡。

贈訥古伯

有僧有僧住江心，以色殺人凶且淫。
貪官若吏私其金。

滅跡鉅海無由尋安知冤魂痛不釋羣然號訴衆所覲
盡誅凶儔冤始白誰其白之訥古伯

送高郎仲德往汝州迎母

高郎八歲失其母每一言之淚如雨忽然有信自北來
知道慈親在臨汝艱難一別四十年驚喜失聲渾欲舞
水行有舟陸有車襜被即行身欲羽遙想團欒再拜時
膝下抱持喧笑語人生天地誰無母此別真如隔今古
焉知孝感動神明萬里言歸復相聚吳興山水清且遠

指日安輿還樂土我當理舟楫迎汝買紅纒酒封肥甯
斑衣喜色映庭萱白髮從教老農圃

次韻葉公右丞紀夢

倦遊客子何時去屢欲言歸天未許故鄉樂事時上心
破浪長魚日登俎一蓑一笠得自由某水某丘猶可數
前年有詔舉逸民一旦馳驛登天府豈知佐理自有才
勉強盡瘁終無補青春憔悴過花鳥白日勾稽困文簿
栖栖顏汗逐英俊徃徃笑談來訕侮倦僕思歸語見侵

瘦馬長飢骨相拄天生我公出瑞世輔相明時期復古
好將圖畫上凌烟未遂衣冠挂神武髭須半白稱貂蟬
步履漸輕宜印組道長自覺小人消亂沮政須君子怒
得閒有兆天與祥吉夢初回月當戶因公此意乞歸田
不辭歌詩為公舞

楊天瑞府判平冤詩

至元年間歲辛卯建寧總管有馬謀間因盜起建陽縣
欲引鎮軍肆誅屠聞民張氏有女子小名月娘美且姝

思得此女恣淫泆乃誣張氏與賊俱月娘逃匿不可得
旁及鄰女遭姦汙既得月娘欲滅口父母親戚皆囚俘
一家九人一時斃痛入骨髓天難呼其餘五人亦瀕死
身被榜掠無完膚人家不幸產尤物破家滅族真無辜
楊侯天瑞為府判深疑此事皆虛誕奮髯仗義以死爭
力謂馬謀當併按月娘得脫為良人待盡殘囚出獄犴
沉寃極枉一旦伸臺省交章同論薦聖神天子甚明察
詔下天門發英斷馬謀竟以罪伏誅行路聞之亦咨歎

邑人為侯生立祠牲酒續紛勤薦裸楊侯平反世希有
宜有陞遷示旌勸政事固因才德美歲月難將資品算
即今已過二十年那拋朱紱換青衫舉夔在位方進賢
請為誦我平冤篇

賦張秋泉真人所藏研山

泰山亦一拳石多勢雄齊魯青巍峩此石却是小岱岳
峰巒無數生陂陀千巖萬壑來几上中有絕澗橫天河
粵從混沌元氣判自然凝結非鑄磨人間奇物不易得

一見大叫爭摩挲米公平生好奇者大書深刻無差訛
傍有小研天所造仰受筆墨如圓荷我欲為君書道德
但願此石不用驚巧偷豪奪古來有問君此意當如何

題舜舉摹伯時二馬圖

二龍何時飛上天空有駿影人間傳一匹鳳頭來于闐
一匹賜名花滿川李侯作畫述者錢想見溫公當國年
太平時節巡遊少立仗歸來飽春草老向天閑無戰功
馬自不逢人皤皤

兔

少年馳逐燕齊郊身騎駿馬如騰蛟耳後生風鼻出火
大呼陶拉飛鳴髀如今老大百憂集拄杖徐行防喘急
卷中見畫眼為明驥聞秋風雙耳立

陶拉國朝語謂兔也

贈相師王蒙泉

王君善相多奇中說好誇奇無刺風已將幻化等虛空
問壽幾何持底用遭時乏才偶致位處非其宜常自訟
詞林每媿文字拙玉帶却憐腰體重身歸閭里困衰疾

心戀闕庭形夜夢端如老驥歎欲倒駿骨雖存難受鞚
清溪如玉遶屋廬箇箇漁舟時看弄且將閒散樂餘生
豈望殘年給殘俸

松雪齋集卷三